

Eth senhor Guèrra e era senhora Pau

Dupond e Dupont, Batman e Robin, era Sèca e era Mèca, eth pan damb chicolate, es gambes damb nata. Eth mon ei plen de parelhes inesperades e aguesta ei era istòria d'ua de ben estranha: era deth senhor Guèrra e era senhora Pau.

Tot comencèc hè ans, quan un bon dia, ua mainada fòrça simpatica que se didie Pau, anèc a demorar en ua caseta que i auie naut d'ua tuqueta, a on tostemp ploiguie e tronaue, enquia qu'arribèc era.

Non guaire luenh i auie ua casa fòrça destralalhada a on i viuie un mainatge dera sua edat que volie èster inventor e se passaue tantes ores barrat solet en sòn laboratòri que s'auie tornat fòrça mauencarat e fòrça antipatic.

Se didie Enric Guèrra, mès toti li didien Guèrra e sonque li shautauè èster barrat en sòn talhèr endonviant mashines estranhes e atau siguec com se coneisheren... Eth senhor guèrra e era senhora pau.

Londeman d'arribar, e mentre Guèrra trabalhauè en sòn talhèr en tot bastir un misteriós artefacte, Pau se presentèc en casa sua damb un pastís d'ahragues hèt especiaument entada eth. Guèrra se tornèc vermelh, e s'estonèc, pr'amor que ère eth prumèr còp en plan de temps que li hègen un present. La cuelhec sense díder ne gràcies.

Un viatge solet, totun, s'enforismèc pr'amor que Pau l'auie distrèt deth sòn trabalh e non li shautauè bric que lo shordèssen. Aalavetz cuelhèc eth pastís, lo lancèc tàs lordères e sagèc de concentrar-se ena sua darrèra invencion... mès era flaira deth pastís non la deishauè pensar, atau que non podèc resistir era temptacion de tastar-lo: - Mmm! Quina delícia! Hège temps que non minjaue ua causa tan bona!. E per prumèr còp en fòrça mesi arridolèc.

Quate dies dempús, fin finau, Guèrra acabèc de bastir era sua misteriosa invencion: ua sòrta de catapulta terrorifica entà lançar bombes a longa distància. - Qu'en harè? -ce pensèc. E decidic qu'anarie entara ciutat e mostrarie era sua invencion ath famós generau Batalha. Ère ua catapulta impressionanta! mès abans auie de provar-la e ac harie en jardin!

Mentretant, Pau auie anat a cercar cargòlhs e ahragues sauvatges. Flairèc ua aulor inquietant. Ère de hum!!. Ben lèu vedec huec e eth bòsc sancèr!. Auie d'escapar-se e avertir a quauquarrés de que l'ajudèsse a amortar es ahlames que començauen a acaçar-la. Pro li costèc de poder-se escapar! pr'amor qu'eth huec s'apropaue perilhosaments entà casa sua.

Pau anèc viste anar a avertir Guèrra que s'auie declarat un gran incendi e cremaue tot eth bòsc. Guèrra, que ja ère prèst tà provar era catapulta en tot lançar ua calaishèra, non sabie ce qué hèr. Coma lo podien amortar? Es pompièrs trigarien massa. Atau que se meteren a pensar, a pensar, a pensar... e alavetz aueren ua idèa: cuelhèren era catapulta e, en lòc dera calaishera, i meteren quauqui farrats plei d'aigua.

Non sabien se foncionarie. Aquera catapulta ère entà lançar bombes e non farrats d'aigua ère pensada entà destrúir armades e non entà salvar bòsqui. Totun, s'ac valie provà'c. Un, dus e tres!. Deth cèu comencèren a plòir farrats d'aigua tath miei des ahlandes e, d'aguesta manèra, dempús de gastar toti es farrats que trapèren, artenheren amortar eth huec.

Londeman, tot eth pòble felicitèc Guèrra! E er alcalde li pengèc ua medalha! Mès çò que mès illusion li hec, siguec que Pau li regalèsse era sua samarreta mès estimada, alavetz Guèrra li expliquèc qu'era catapulta auie agut quauques modificacions e ara se didie "mashina d'amortar huecs" e en aqueth moment toti dus s'encuederen qu'èren perdudament amorosi er un der aute.

Quan se heren grani se maridèren e ara, damb eth pas deth temps, eth Sr. Guèrra s'a tornat mès amable e se guanhe era vida en tot premanir pastissi d'ahraga per contra, era Sra. Pau cada dia ei mès repotegaira e se passe tot eth dia en talhèr endonviant electrodomestics. Er amor ei atau ...

Guidon: Lluís Arcarazo

- 
- 
- Amb el suport de 

© CCRTV Interactiva, S.A. | Televisió de Catalunya, S.A.

- [Avís legal](#) |
- [Segell de qualitat](#) |
- [Contacta 54€0](#) |
- - [Idiomes](#)
 - [Català](#)
 - [Castellano](#)
 - [English](#)